

中國古典文學基本叢書

中華書局



船山詩草

下冊

中國古典文學基本叢書

船山詩草

下冊

〔清〕張問陶撰

中華書局

船山詩草卷十三

京朝集

丙辰

送吳山尊肅同門就婚山左山尊繼婦爲淵如觀察從妹

藻翰紛飛捷有神，居然天上石麒麟。性情豪處追前輩，才藝分來了十人。舌底翻瀾終自放，醉中投轄不知貧。相如典冊枚臬筆，爭看凌雲氣象新。

手披紗扇笑聲來，韻事剛如《玉鏡臺》。莫倚元龍湖海氣，須防謝女弟兄才。分明好夢重迴枕，消受名花遞舉杯。預想春風聞喜日，一枝紅杏爲先開。

丙辰人日與亥白兄受之弟飲酒

幾經人日醉，鬚髮忽中年。虛士羞名下，雄心退酒前。氣真惟骨肉，詩好亦神仙。九陌空簫鼓，鄉愁正黯然。

初春漫興

一院晴光睡起遲，亂書堆裏坐移時。心方清快偏無酒，境亦尋常忽有詩。薄宦久紆經世策，故人誰助買山費。眼前栩栩遊仙夢，爲蝶爲周總未知。

春初與亥白兄飲酒作

又看庭樹長新枝，依舊都城酒一卮。官似唐花無氣色，身如梁燕久棲遲。春塵擾擾愁方覺，夜犬狺狺夢不知。枉被時流談姓字，可憐人口數聯詩。

正月八日兩峰寓齋分韻得鄰字是日與海客筆談。

遂引滄洲趣，清談筆有神。壺觴成雅集，笠屐稱詩人。繡虎才雙絕，騷壇氣一新。不知天海闊，舉酒問仙鄰。

寄答楊米人明府瑛昶

乾坤惟數子，緣至卽相逢。對酒同叉手，看雲忽蕩胸。宦情閒似鶴，詩筆健如龍。交豈關離聚，瑤函又幾封。

秀語標神韻，新城一瓣香。人言空唧唧，我法自堂堂。毀譽時流暗，淵源古趣長。聲名在王後，端爲老漁洋。

莫厭風塵俗，臨民最有情。忘年交北海，下考望陽城。能吏誰肝膽，通人卽父兄。不才慚橐筆，無地說功名。

別夢經時結，遙遙丁字沽。開緘詩律細，堆案酒錢粗。乞食悲貧士，雕蟲惜壯夫。墨光騰劍氣，慷慨報風胡。

正月九日顧亭王文齋中小集分韻得于字限七言排律

珍重辛盤酒百壺，老人星象應南弧。書逢細字猶能讀，杖倚長藤不用扶。塵外恒沙觀世久，殿中春宴拜恩殊。聲名廡舍東西陸，子弟詞源大小蘇。前輩威儀恭則壽，列仙風貌道之腴。忘年雅會知誰健，卜夜聯吟好自娛。衣鉢望公傳慧可，滑稽許我醉淳于。歸心莫與花爭發，且聽絃歌遍九衢。

春日奇寒對酒作

春晴日無色，繞屋多悲風。青陽氣不舒，閉塞成隆冬。乾坤作奇冷，萬象難昭融。忍凍坐清晝，蠢然如蟄蟲。攤書斟且讀，不知杯已空。人生貴適意，百年花一紅。天時且難測，何者爲窮通。對酒發長歎，欲歸山萬重。孤吟忽寒噤，冰雪填心胸。

漫興一首簡滄湄

不著奇文解客嘲，迂疏久已忘塵勞。敝車羸馬心情適，破帽殘衫氣象豪。有定升沉空處見，無根毀譽醉中逃。此身人世供遊戲，俯仰何妨似桔槔。

與石琢堂同年夜語

夢冷虛堂舊雨來，幾年懷抱暫時開。君能磊落心千古，我豈猖狂酒一杯。幻境儘容蒼狗變，天機應免白鷗猜。竟無知己身方貴，聽到時名愧不才。

思誤書圖爲未谷題

烏焉傳寫易成訛，妙悟原因識字多。莫笑蠹魚鑽故紙，累心塵網亦消磨。魚豕何曾誤曉人，書逢思絕自通神。須防甚解成穿鑿，好挽淵明共寫真。

元夜吴香竺同年瑛招同吴穀人前輩昆仲胡梁園枚舍人及亥白兄集嚴

少峰榮吉士寓齋分韻得入字

酒病與年深，醉鄉期不入。艱難持新戒，屢爲故人執。煌煌元夜燈，興飛觴自急。枯腸得霖雨，忽如龍

起蟄。所守或非真，居然成結習。開懷忘賓主，仙仙紛坐立。志士嘔亦豪，其狂何可及。笑指糟丘臺，參天終岌岌。

正月十八日穀人贊善招同亥白兄陪顧亭王丈及東林香圃昆仲集有

正味齋分韻得啼字

落燈風近且招攜，腐史惟堪傳滑稽。陳迹無聊轉驢磨，春深何處問鶯啼。杯傾綠酒心難醉，身到紅塵夢不迷。漫詡張王新樂府，主人留客要分題。

丙辰春日喜稚存至自黔南

小別各萬里，重逢今五年。酒因新病減，詩望故人編。聽雨增奇夢，看花補舊緣。征苗諸將相，返旆讓君先。

題畫

右丞頗好道，蘇晉欲逃禪。詩酒皆餘事，山林有少年。茗柯參實理，琴趣妙無絃。歎我風塵久，披圖爲惘然。

蔬香老人將歸金陵賦詩贈別

霜髯雪鬢望如仙，風趣依然好妙年。毀譽久空名下士，飛沉一笑夢中緣。日邊遊興閒能補，意外君恩老更全。歸去若談皇極宴，杖藜親到九重天。

雛鳳聲兼老鳳聲，一家人好爲多情。詩才脫口俱千古，茶話連宵易五更。但覺交深忘異姓，轉疑緣重已前生。幾時同聽寒江雨，剝棗烹葵理舊盟。

春江放棹圖爲許慕魯嘉猷題

春風吹夢繞鄉關，春水初生一棹閒。帆影迷離煙樹外，漁歌隱約畫圖閒。飛來細浪都成雨，遠到斜陽更有山。銷盡輪蹄無限鐵，塵中能得幾人還。

躊 蹰

文采安能做腐儒，聲華何必艷蓬壺。久疑宦海無歸路，漸覺名場是畏途。與世不宜輕去就，誤人祇用幾躊蹰。逃禪入道翻多事，合買扁舟泛五湖。

二月十九日出永定門暫至東高村卽目

出郭知春遠，西山雪乍晴。高原開日氣，灌木聚禽聲。官馬黃初浴，旗田綠未耕。路歧村徑熟，老衲又逢迎。

和馮孟亭浩前輩重赴鹿鳴詩

月明老桂長新枝，歡宴重陪自咏詩。名大已超千佛外，丹成真到九還時。喬南梓北聲華美，舜丙堯辰際遇奇。廊廟山林清福備，此中滋味幾人知。羣才濟濟畏前賢，難得秋高共此筵。六紀鄉書皆後輩，一朝恩榜重元年。懸車偏際風雲會，杖國還多翰墨緣。早晚重來聞喜宴，願隨花馬執吟鞭。

題夢遊圖爲胡夢湘題

道心平遠色心奇，熟透黃梁夢未疲。右虎左龍何處守，朝雲暮雨至今疑。積來非想都成幻，悟到真空定有期。我欲拍肩輕喚醒，露蘂煙柳正迷離。

二月晦日燈下作

既醉居然夢，無花也自春。詩忙非急務，官冷是閒人。攬鏡虛中歲，攤書謝雜賓。看囊錢久盡，休笑不能貧。

送王謙六履吉明府歸養

春山處處子規聲，話到還鄉便有情。入世誰能知去就，保身才不負生成。似聞過是迴帆好，那見棋從打劫贏。大海風波都閱歷，尚餘何事未心平。台灣之役，謙六漂入閩洋數日。

閩天無雁返東風，山海蒼茫夢影中。能退急流真灑落，不談時務亦英雄。萊衣爭羨還山早，錦水何年載酒同。竟補《白華》詩一首，肯將此樂換三公。

寒檠永慕圖爲稚存題

母心長，兒心小。書聲應機聲，燈光爲忘曉。書聲高，機聲暇。熒熒無盡燈，蟬聯不知夜。父志母能成，父書母能教。節義文章無不到，使兒如父兒能肖。賤可貴，貧可富，偏是劬勞妨母壽。學有名，仕有祿，春暉不照孤兒哭。君不見寒檠一點紅于血，圖畫無聲寫嗚咽。寸草心存卽母心，拔心不死長淒絕。

顧亭王丈以花塢夕陽遲詩意寫照題句寄之

老去看春不草草，春光九十猶嫌少。青山深處萬花濃，日日憐花坐清曉。花氣薰人雨乍晴，淡紅香白漸分明。依依何止閒蜂蝶，便是斜陽亦有情。斜陽如爲花留戀，一抹朱霞界天半。暖日暉暉低近人，

妙才珍重題花片。嚴維麗句寫春融，五字傳來抵畫工。粉本忽教公入手，自圖清影上屏風。人生樂事論懷抱，白頭未必輸年少。浮世升沉鏡裏看，天機到此真清妙。先生門對六朝山，桃葉桃根倦往還。帽影遠尋紅雨外，屐聲留住白雲間。閒中曳杖忘朝暮，富貴輕如草頭露。人境匆匆劇可憐，拈花一笑生禪悟。畫境詩情自眼前，圖成祇覺味纏綿。好花肯似迴風雪，落照偏如水上船。層霄日月方紜纒，賜酒曾陪皇極殿。兒齒重生儘宴游，童心未盡猶詞翰。雲出無心亦偶歸，江南江北正芳菲。花間遠寄平安字，爲語羣鶯莫亂飛。

三月初旬連日陰雨懷亥白椒畦闌中

迢迢鎖院數嚴更，一例排檐夜雨聲。得水魚龍應吐氣，無言桃李正含情。文章骨肉關心久，山海風濤入夢驚。才大不難爲世用，初元珍重此科名。

四月十日雨夜被酒爲董孝廉鍊金題畫

婚宦銷磨強自寬，風塵閱歷儘艱難。詩書滋味山林趣，慚愧今宵畫裏看。

丙辰夏日王鐵夫就華亭廣文任

簡傲今誰似，斯人卽古狂。時名參毀譽，宦迹半行藏。絳帳尋高弟，青山接故鄉。海雲飛不定，何處哭

文章。

伉儷才雙絕，華顛並早衰。有兒勤夜課，無婢給晨炊。世大孤行易，言高直道危。古人先器識，風度願委蛇。

五月初九日雨夜枕上作

乞米書多漸廢詩，故人如悔絕交遲。可憐才與年俱退，惟有清貧勝昔時。
百年身世一浮萍，幾盞醇醪養性靈。熟讀《離騷》還痛飲，不妨我醉衆人醒。

錢籀石先生畫盤山五松圖

披圖笑指真松石，只當匆匆作草書。老樹精神奇至此，前賢風趣妙何如。詩懷華髮攜筇目，人想青山下筆初。畢竟廟廊清節重，參天材大不蕭疏。

五月中旬感懷

只覺攻詩累此身，廢詩依舊減精神。燕知官冷將遷壘，犬信家貧不吠人。拍案有聲驚債主，讀書無暇愧詞臣。炎炎長日空飢走，銷盡車前十丈塵。

丙辰五月生日與亥白兄及謝康侯生晉查蘭圃堂俞澧蘭大樟王香圃麟生

二癡恩注叔姪小集飛鴻延年之室以天生我才必有用分韻得必字

自我屬有生，壽夭何可必。舉杯祝長庚，聊以永今日。故人喜無多，數止竹林七。浮雲亦偶合，良會尚真率。同氣愛已深，忘形情愈密。披衣不巾襪，隨意具梨栗。開軒來清風，炎威忽如失。青山歸未能，塵網事難畢。此地卽醉鄉，居之安且吉。

喜田橋來都與椒畦亥白飲酒作

不屑治生產，飄搖同至今。幾無餬口計，恐負讀書心。年長才偏退，家成累已深。長歌真當哭，慨慷爲知音。

我已歸難定，君來更黯然。升沉空閱世，才命欲疑天。祿養知何日，飢驅亦有年。看囊同一笑，羞澀買山錢。

見面尋常事，離居本未忘。交深同骨肉，貧極悔詞章。得氣輸同學，無田惜故鄉。浮生如我輩，何以卜行藏。

十五年如夢，荊州更益州。淒淒車笠誓，草草稻梁謀。世枉生狂客，人誰愛遠遊。一樽燕市酒，難共洗征愁。

酬阿雨窗林保轉運見寄詩扇

忽來風一握，開扇渺相思。未見空搔首，將書許論詩。因緣宜宿世，名字豈新知。佳句關心久，拈毫欲和遲。

五字今王孟，披襟寫意園。亭池留宦迹，魚鳥聽清言。名輩心難俗，詩人政不煩。幾時親載酒，話雨醉東軒。

謝瞿鄴亭中泌送酒

酒船新到每平分，才擊泥頭已半醺。醒客尋常空笑我，醉鄉緩急幸逢君。誰從塵海迴青眼，頗勝山人贈白雲。冷落交情猶好在，糟丘不著《送窮文》。

漫興

渺渺閒愁減帶圍，湘絃寫怨有金徽。浮雲一出原無定，大鳥三年竟不飛。偶著詩魔增幻想，爲防酒失損天機。朝衫典後朝參懶，莫訝空堂舊雨稀。

題趙渭川明府希璜雲車飛步圖

下界崎嶇上界平，車聲安穩逐雷聲。竟飛天外翻無味，小駐雲中却有情。奇句拈來遊興遠，好山多處
長官清。手揮雷雨如行縣，不用羣仙苦送迎。

送桂未谷馥之任永平

忘形爾汝亦前緣，日日相尋問酒錢。時望居然成老輩，交情何止爲同年。科名偏向衰齡得，心血終因
小學傳。慷慨一官窮六詔，白頭未擬賦《歸田》。

儒官偶見宰官身，已轉頭銜尚苦貧。書擬八分專一代，酒飛三雅辟千人。窮邊聽雨應懷舊，委巷聞雞
暫結鄰。莫道天南風土異，嚙言椎髻亦吾民。

撲面炎風萬里餘，國門驅馬意踟蹰。醉中分手原如夢，別後關心定有書。絕域能遊誇矍鑠，老年爲政
肯粗疏。宦場時論輕儒素，憑仗吾賢爲掃除。

塵緣空後見天機，悔不高名占少微。人世幾人酬遠志，留心他日寄當歸。奇山塞路蠻煙細，怪鳥呼風
瘴雨飛。回首潭西舊精舍，可容閒煞釣魚磯。

夏日與趙味辛飲酒詩

舍人風格本飛揚，潦倒新看鬢有霜。老不登科文愈古，貧尤多病酒難狂。眼中傀儡真兒戲，夢裏升沉
易夕陽。撲筆推書同一笑，年來我亦悔名場。

誰折櫻桃贈一枝，紫薇花底夢遲遲。尋常且聽應官鼓，五十聊吟自壽詩。廣坐忽驚前輩少，空囊漸畏故人知。風塵眯眼歸何晚，話到青山醉不辭。

敢從青史溯家風，兩姓高曾際遇同。事隔三朝猶想象，交聯五世幾窮通。乘軒自笑氈氍鶴，緣壁都成蝨蠹蟲。畢竟文章難報國，相看搜句百無功。

萬人如海任沉浮，笑倚薰風上酒樓。不樂豈能爭福命，此生何可誤窮愁。無多心血終宜養，有限狂名亦易收。天外飛仙須我輩，黃沙影裏暫勾留。

歎別

捲地炎風儘怒號，夕陽影退衆星高。氣埋長劍光埋筆，醒讀《元經》醉讀《騷》。漸散酒場還作鬧，已闌詩興不能豪。投林倦鳥紛紛去，獨鶴無聲下九皋。

墨卿比部齋中與穀人侍讀味辛舍人春松比部研農農部蘭士水部錢

未谷明府之永平以玉壺買春賞雨茅屋分韻得雨字

炎雲如勢交，一日幾晴雨。閉門開小宴，落落同心侶。解衣恣磅礴，雜坐誰賓主。坐有遠行人，圖南氣飛舞。酒闌更移席，僮僕忘勞苦。拵扇來天風，庭空不知暑。醉鄉無禮節，世態重爾汝。感歎百年中，歡場亦可數。

題鐵冶亭保玉閭峰保兩侍郎師聯床對雨卷子

山林廊廟外，自寫弟兄情。血性宛然在，家風如此清。論文增友愛，競爽亦公卿。天趣懷坡穎，無聲畫雨聲。

月夜

醉倒何曾負月明，夢魂常與月俱清。故人不飲愁如海，空對寒光到五更。

題戴花騎象圖送未谷之永平縣任

花枝搖搖圍白頭，身騎大象高如丘。蠻荒作吏儘奇偉，衙鼓不傳時出游。長身短髮便便腹，來往山林豺虎伏。乘軒跨馬爾何人，俯首塵寰空局促。獐男獠女走且驚，宰官高坐真神明。瓢笙蘆笛競馳逐，御風疑是空中行。象鼻如龍開道路，杜鵑如火紅千樹。天涯遠宦早歸來，此是升庵荷戈處。

丙辰七月初一日石琢堂同年招同吳少甫吏部遊法源寺齋罷得句

清齋深悔別煙霞，弔古雲堂日又斜。人境無情空梵貝，鬼雄何代不蟲沙。酒名枉被殘僧笑，詩筆難禁老輩誇。獨抱閒愁誰解釋，晚風凌亂合歡花。